

Time - 7:30 -7:40Hrs  
Regional News Unit AIR Aizawl  
Friday, November 22, 2024

## REGIONAL NEWS BULLETIN

### HEADLINES (MORNING)

- Akashvani Lunglei Station chuan vawiin hian kum 30 a tling a, he ni pual hian Akashvani Lunglei Station ah lawmna hun buatsaih a ni ang.
- LAD Minister Pu C. Lalsawivunga chuan sorkarin Village Council term thla 6 pawttawia inthlan hun a sawn hma chhan chu inthlan huaihawt hautak tak chhawk zangkhai tura hmalakna tur a ni a ti.
- Prime Minister Narendra Modia chuan nizan khan Guyana Parliament Special Session-ah thu a sawi.
- Pakistan-ah ralthuam kengten khualzin phur van an kahnaah mi 38 aia tlem lo an thi.

<><><>

### AKSAHVANI LUNGLEI

Akashvani Lunglei Station chuan vawiin hian kum 30 a tling a, he ni pual hian Akashvani Lunglei Station ah lawmna hun buatsaih a ni ang.

Kum 1995-a din Akashvani Lunglei kum 30 tlin lawmna hi Lunglei khawpuia Akashvani Station ah buatsaih niin he hunah Station Director leh Mizoram Cluster Head Pu DR Lalropuia bakah Doordarshan Kendra Director (News) Nampibou Marinmai ten an tel pui dawn a, anni bakah hian Akashvani Aizawl atangin thawktu mi 20 chuang he hun chhim tur hian an kal a, Field Station hrang hrang Champhai, Kolasib, Tuipang leh Saiha atangin an tel bawk a ni.

Nizana Akashvani hnuiaia thawkte inhmelhriattirna hunah Station Director leh Mizoram Cluster Head Pu DR Lalropuia chuan Akashvani hnuiaia thawk te chu chhungkhat anni tih hre reng turin a chah a, station hrang hrang te chu thawhhona tha vawng nung reng tura chahin office chu hnathawhna hmun chauh nilo midangte nena inkar tha tak siamna pawimawh tak a ni a ti a, hlawhtlinna chang ho tura thawhrim a pawimawh tih a sawi bawk.

Kan corr report lo ngaithla ang.

<><><>

### VC

Local Administration Department Minister Pu C. Lalsawivunga chuan sorkarin Village Council term thla 6 pawttawia inthlan hun a sawn hma chhan chu inthlan huaihawt hautak tak chhawk zangkhai tura hmalakna tur a ni a ti.

Akashvani corr zawhna chhang Minister chuan dan pangngaia a kal chuan nakum financial year chung hian election lian pui pui pali buatsaih a ngai dawn a.

Village Council leh Local Council election chu August/September thlaah neih tur a ni a, LADC inthlanpui November thla bawrah neih tur niin, a kumleh 2026 January/February thlaah AMC inthlan huaihawt a ngai leh dawn bawk a ni a ti.

Minister chuan 15 Finance Commission period zuih ral lamah India ram a awm mek tih sawiin hemi hnuaiah hian sum hnar lian ber zinga pakhat, Post Devolution Revenue Deficit Grant chu kum tin an titla hniam zel a ni a ti a. 15 FC period chhungin Mizoram chu cheng vbc 6544 dawng turin tih a ni a, nakum Financial Year (2025-26) ah chuan nasa taka tlak hniam belh leh in thla khatah cheng vbc 48 leh nuai 83 vel chuah Mizoramin a dawng tawh dawn a ti a. Nakum lama election neih tur pali zinga a hautak ber VC Election bik chu sawn hma ni se, sum leh pai dinhmun engemaw chen a chhawk zangkhai thei ang tih ngaihtuah chungah thutlukna siam an nih thu a sawi a ni.

VC Term pawhtawi a ni hian MNF party a barakhaih hle tih MNF Senior Vice President Dr. R. Lalthangliana chuan Akashvani palai zawhna chhangin a sawi a, Village Council chu democracy ramah chuan an hlut thu leh khawtlang enkawltu pawimawh sorkar pawhin a hman tangkai em em a ni a ti a. Chief Minister approval tih lawnga notification a awm chu eng nge a chhan ni ang tih chu an zawhna lian tak a nih thu a sawi a. Village Council Association hotute pawhin engmah an hriat loh thu sawiin notification-a inthawn teh thut chu thil thleng zen zen lo a ni a ti.

Mizoram Pradesh Congress Committee, MPCC President Pu Lal Thanzara chuan Congress leh MNF sorkar lai pawhin inthlan hautak tak tak an hmachhawn ve thin tih a sawi a. Akashvani zawhna chhangin Pu Lal Thanzara chuan chanchinbuah party dang VC an la tam avangin hnathawh a har tih Home Minister in a sawi a lo hmuh thu sawiin, tun sorkarin ngaihtuahna dang an neih bik tak chhan ni thei chu anmahni party lo VC ten hmasawanna hna te an thawk ang tih an hlau ni berin a langa a hriat thu a sawi a. Party dang an ring lo hrim hrim tih sawiin ZPM party chiah an ring a nih chuan an kawng a bumboh viau a rin thu a sawi a ni.

Village Council term pawhtawi chungchanga kan corr report lo ngaithla ang.

Mizorama Village Council inthlan hnuhnung ber chu kum 2020 Aug ni 27 khan buatsaih a ni a, VC term hi kum 5 chhung niin sorkar chuan tuna term hman mek chu Section 5 of the Lushai Hill District (Village Council ) Act, 1953- in sorkar thuneihna a pek anga thla 6 pawhtawi a rel a, hemi ang hian kumthar feb ni 19 ah tuna VC term hi a tawp tur thu LAD chuan hriattirna vawiin khan a tichhuak a ni.

VC term hi nakum feb thla thleng chauh a nih dawn tak avang hian inthlan hun hi Feb thla ral hma ngeia neih a ni dawn niin a lang a, inthlan hun tur erawh State Election Commission in a la puang dawn a ni.

<><><>

#### ADVISER TO CM-REFUGEES

Adviser to Chief Minister Pu Lalmuanpuia Punte, MLA chuan raltlan ten awmna tur atana an duhna hmun an thlang leh hmun hrang hranga an kal kual thin chu thil fel lo tak a nih avangin, mumal zawka inkaihhraina siam a tul a ni a ti.

Nimina Bangladesh atanga raltlante chungchanga Lawngtlai District Bawrsap Pu Cheemala Siva Gopal Reddy leh a thawhpuite DC Conference Hall-a a thutkhawmpuinaah Pu Lalmuanpuia Punte chuan he thu hi a sawi a. Raltlan enkawl kawngah hmun khata awmkhawm an nih chuan sawrkar tan pawh hmalak a awlsam dawn tih sawiin Adviser to Chief Minister chuan hmun khata awm khawm tura hmalak mek a ni, a ti a. Bangladesh atanga raltlante chu hmun li - Parva, Damdep-II, Cherluitlang leh Saizawh 'W' ah sawn khawm tura ruahmanna siam mek a ni, a ti a. Heng khua pali zirchiang tur hian Study Team ten nimin lama an flawh vek tawh thu sawiin, khawtlang hruaitute pawh sawipui tawh an nih thu a sawi a. Study Team - te hian an thil zirchian leh enfiah te chu sawrkar 'High Level Committee on Bangladesh Refugees' ah an thlen leh tur thu Pu Lalmuanpuia Punte chuan a sawi a ni.

Bawrsap Pu Cheemala Siva Gopal Reddy chuan Lawngtlai chu Myanmar leh Bangladesh ramri a awm a nih angin raltlan an tam thu a sawi a. Tun dinhmunah raltlan Myanmar atangin mi 6,030, Bangladesh atangin mi 2,014 bakah Manipur atangin IDP - 84 an awm mek tih a sawi a ni.



## IFFI

International Film Festival of India Vawi 55-na, Panaji, Goa-a neih mekah nimin khan film industry tih hmasawna tura India Cine Hub portal hman tangkai dan tur sawi ho a ni

Information & Broadcasting Ministry hotute leh State hrang hranga Nodal Officer, Film & Tourism promotion te nen film industry tih hmasawna tur a India Cine Hub portal hman tangkai dan tur hi sawi ho a ni a. Ministry of Information & Broadcasting Secretary Pu Sanjay Jaju chuan thutkhawm hi kaihruaiin India ram state hrang hranga film lama tui mi te tihhmasawn nan India Cine Hub portal hman tangkai a tul thu a sawi a. Thutkhawmah hian Mizoram atangin I&PR department Secretary Pi Betsy Zothanpari Sailo leh a thawhpuite an tel a. State engemaw zah he portal la hmelhriat lo an awm laiin Mizoram State chu portal hmang tan thei tur a data pawimawh thelut tawh zingah an tel thu tarlan a ni a. IFFI hi ni 10 awh tur niin, hemi chhung hian film siam leh a kaihnhawih a tui Mizo thalai thlanchhuah te chu Film workshop hrang hrangah an tel dawn a ni.



## MSPMC

Mizoram State Project Monitoring Committee (MSPMC) Vice Chairman Pu R. Lal Rinawma kaihruaiin Thenzawla Sangha Pui dahkhawmna leh siam chhuahna hnathawh an endik a, Sangha dahna tur dil hrang hrang, Rearing tank leh Nursery tank siam te bakah building sak thar te chu a hmunah uluk takin an endik a ni.

Endikna neih zawh hnu hian Staff Guest house ah thukhawmin, hnathawh tha tawklo lai an hmuh te an sawi a. MSPMC Vice Chairman chuan Sanghaa kan intodelh nan hmachhawp lian tak an nei tih Fisheries Department hotute chu a hrilh a. Thahnemngai tak leh tih takzeta thawk tur leh a hlawhtlin ngei theihna tura hma la turin a chah a. Brood Banks a lo hlawhtlina, a kal leh zelnat tur atan visionary plan tha an neih a pawimawh tih a sawi a ni.

Fisheries Department Joint Director Pi Zonuntluangi chuan Mizoram State Project Monitoring Committee in Brood Banks a hmuna rawn tlawh a, an hmalak leh zelna tur thurawn tha tak tak an pe chu lawmawm a tih thu sawiin, an thurawn pek te chu theihtawpa an bawhzui tur thu a sawi a ni.



#### AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



#### PM IN GUYANA

Prime Minister Narendra Modia chuan mitin huapzo rorelna din turin mipui rorelna democracy tluka hmanraw ropui a awm lo a ti. Nizana Guyana Parliament Special Session-ah he thu hi sawiin Prime Minister Modia chuan khawvel tana hmasawna tura inngahna pawimawh ber chu a hmasa bera democracy dah a ni a ti a. Democracy chu kan thisenah a bet a, hmathlir leh khawsak phungah a tel tlat tawh a ni a ti.

Pu Modia chuan eng ram pawhin harsatna tawk se India chu a che chhuak hmasa ber a ni a tih sawiin tanpuitu hmasa a ni zel a ti a. India leh Guyana inzawmna chu a danglam bik hle a ti bawk.



#### PAKISTAN

Pakistan-ah ralthuam kengten khualzin phur van an kahnaah mi 38 aia tlem lo an thi. Inbeihna thlenna hmun hi Khyber Pakhtunkhwa hmarthlang lama tlangmite chen tamna hmun a ni a ti a. Thudawn danin Kurram tribal district ah inbeihna hi a thleng a. Mitthi leh hliam tuar zat hi an la pun rin a ni.

Lirtheia chuante hi Peshawar atanga Parachinar pan tur leh Parachinar atanga Peshawar pante an ni.



#### DEFENCE

Defence Minister Rajnath Singh leh US Secretary of Defence Lloyd Austin te chu nimin khan ram pahnih thawhdunnate sawidunin an inkawm. Hruaitu pahnihte chuan India-US ralthuam lama thawhdunna chu fakawm an tih thu sawiin indawrna tha zawk nen tha taka an thawh thu sawiin thu pawimawh inpek tawn kawngah leh thilsiam chhuah kawngah an thawhdunna a tha hle an ti bawk. ASEAN Defence Ministers' Meeting-Plus vawi 11 na Laos a neihah Defence Minister Rajnath Singh-a hi a tel a ni.



## PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 116-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

